



## Publicaziuns dalla vischnaunca, jamna 24

### Damonda da baghegiar

**Nr. 2013-1035.000**

Datum da publicaziun: ils 14 da zercladur 2013

**Il patrun:** Pauli Manetsch Via Alpsu 26, 7180 Disentis/Mustér

**Il representant:** Pauli Manetsch Via Alpsu 26, 7180 Disentis/Mustér

**Object:** Nova garascha, parcella 535, Via Alpsu 45, 7180 Disentis/Mustér

- Ils plans da construcziun ein deponi tier l'administraziun communal.
- L'investa publica cuoza 20 dis dapi il datum dalla publicaziun.
- Eventualas protestas encunter sura damonda da baghegiar ein d'inoltrar a scret enteifer 20 dis alla istanza da baghegiar, caum postal 57, 7180 Disentis/ Mustér. La protesta sto esser motivada e sut-tascretta dil recurrent ni da siu representant.

Disentis/Mustér, ils 10-6-2013

*Uffeci da baghegiar Disentis/Mustér*

---

### Lubientschas da baghegiar

L'istanza da baghegiar ha concediu suandontas lubientschas da baghegiar:

*2013-1021.000*

Lisa Schmidt-Candinas, Via Alpsu 23, 7180 Disentis/Mustér; sanaziun dil baghetg annex, parcella 681, Via Alpsu 23, 7180 Disentis/Mustér.

*2013-1022.000*

Armin Manetsch, Via America 8, 7183 Mumpé Medel; spazzar il baghetg d'economia, modificaziuns da terren, parcelas 2363 e 2381, Plaun Sut, 7183 Mumpé Medel.

*2013-1024.000*

Administraziun hotel «Pazzola», Gioni Fry-Fischer, Via Sursilvana 11, 7180 Disentis/Mustér; sanaziun exteriura dallas fatschadas, sanaziun termica dil tetg, sanaziun dalla part gastronomica, baghetg sin parcella 1619, Gassa da Cuo 3, 7186 Segnas.

Disentis/Mustér, ils 8-6-2013

*Uffeci da baghegiar Disentis/Mustér*

---

### Annunzias da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau suandonts projects:

*Nr. 2013-2040*

Cuminonza en condomini Acletta, Via Acletta 58, 7180 Disentis/Mustér; remplazzament dallas storas, parcella 1254, Via Acletta 58, 7180 Disentis/Mustér.

*Nr. 2013-2045*

Silvan Schnoz, Stallikerstrasse 5c, 8906 Bonstetten; construcziun d'in esch en la fatschada enviers damaun, parcella 1208, Gassa da Cuo 29, 7186 Segnas.



*Nr. 2013-2047*

Meinrad e Marie-Theres Deflorin, Gassa da Cuoz 23, 7186 Segnas; sanaziun dil tetg-casa, parcella 381, Via Sut Vitg 6, 7186 Segnas.

Encunter quellas decisiuns san ins protestar a scret enteifer 20 dis dapi la publicaziun alla suprazonza communal.

Disentis/Mustér, ils 10-6-2013  
*Uffeci da baghegiar Disentis/Mustér*

---

### **Cussegl da vischnaunca**

Il cussegl da vischnaunca seraduna *venderdis, ils 14 da zercladur 2013 allas 20.15* en casa communal a Mustér ad ina seduta.

Tractandas:

1. Protocol nr. 3-2013/2016
2. Lescha davart ils dretgs politics e regulativ da fatschentas:  
Revisiun parziala (messadi nr. 2-2013/2016)
3. Center da sport e cultura:  
Credit supplementar per sanaziuns urgentas (messadi nr. 3-2013/2016)
4. Canalisaziun Sontget–Carcarola–Ual d'Acletta:  
Damonda da credit (messadi nr. 4-2013/2016)
5. Ura da damondas (conform ad art. 44 dil regulativ da fatschentas)

*Il president dil cussegl da vischnaunca*

---

### **Rapport da gestiun 2012**

Il rapport da gestiun 2012 dalla vischnaunca da Mustér ei cumpariu. El vegn repartiu quels dis en mintga casada.

Tgi che duess buca retscheiver il rapport ni giavischa ulteriurs exemplars, sa retrer quels tier l'administraziun communal (1. alzada, stanza 10).

*Administraziun communal*

---

### **Temps da vacanzas – temps d'examinar ils documents da viadi**

Persunas che planiseschan da passentar lur vacanzas egl exteriur ein supplicadas d'examinar a dretg temps lur documents da viadi (pass ni carta d'identid). Per l'emissiun da novs documents sto vegnir quintau cun rodund 15 dis da spetga. Fagei quella cuorta controlla, buca che Vossas vacanzas entscheivan cun dagrettas.

*Administraziun communal Disentis/Mustér*



### Controlla da habitonts

#### *Naschientscha*

Laurin Bucheli, naschius ils 5 da zercladur 2013, fegl da Guido e Silvia Bucheli-Caduff.

#### *Mortori*

Pius Condrau-Hendry, naschius ils 27-12-1924, morts ils 8-6-2013.

---

### Clom al survetsch da pumpiers

Persunas che giavischan da prestar survetsch activ da pumpiers e da vegnir incorporadas da niev tier ils Pumpiers Sursassiala san s'annunziar a scret entochen ils 30 da zercladur 2013 tiel commando da pumpiers Sursassiala, Via Salez 11, 7186 Segnas.

Tenor lescha sa negin pretender d'astgar prestar survetsch activ. Decisivs ein liug da lavur e dimora, habilitad corporala e spirtala, tenuta da lavur e senn da responsabladad.

#### *Pumpiers Sursassiala*

---

### Onn da scola 2013/14

Preziai geniturs ed affons

Ils uraris da scola ed igl urari dils transports per il proxim onn da scola 2013/14 ein d'anflar naven d'immediat sin nossa homepage dalla scola: [www.scoladisentis.ch](http://www.scoladisentis.ch).

En num dil cussegl da scola e dil cerchel scolastic engrazieli a Vus per la buna collaboraziun durant igl onn da scola che va alla fin e giavischel a Vus tuts bialas vacanzas da stad.

#### *Kai Hinrichsen, meinascola*

---

### Apparats d'udida

Gliendisdis, ils 24 da zercladur 2013 saveis Vus schar schubergiar e regular Vies apparat d'udida el Center da sanadad Sursassiala SA a Mustér che sesanfla en claustra ed a Curaglia. A Mustér ei il liug signalisau:

*a Mustér naven dallas 14.00–ca. las 15.15  
a Curaglia naven dallas 15.30–ca. las 16.30*

L'uniun Pro Audito Chur, cun signur Arthur Jacomet fa quei survetsch per tuts interessents gratuita-mein.

Cordiala invitaziun  
Center da sanadad Sursassiala SA



### **Uniun da catschadurs Péz Alpetta Salvament d'anseuls**

Preziai purs

Ussa ei il temps che las cauras cavriel fan ansiel. Stedi setegnan ellas si cun lur anseuls en praus che vegnan segai. Aschia vegnan mintga onn anseuls per la veta entras maschinas da segar. Cun pign engaschi san ins evitar quei. Purs che fan fejn en loghens nua che cavreuls setegnan si, ein supplicai da s'annunziar tier nus in di avon che segar. Aschia savein montar mintgamai ina bandiera el prau pertuccond. Entras il disturbi da quellas prendan las cauras ils anseuls ord il prighel. Annunzias saveis far tier il cau da tgira sut la numera 078 817 72 30.

Bien engraziament per Vossa collaboraziun  
*Uniun da catschadurs Péz Alpetta: Il cau da tgira*

---

### **Uniun samaritana Mustér – Cuors BLS-AED**

L' Uniun samaritana Mustér porscha il niev cuors da reanimaziun BLS-AED (reanimaziun cun applicaziun dil defibrilatur automatic).

**Datum:** Sonda, ils 29 da zercladur 2013

**Temps:** 8.30–11.30 e 13.30–16.30

**Liug:** Casa da scola Mustér

**Annunzias:** Ein da far entochen ils 19 da zercladur 2013 tier: Yvonne Flepp, tel. 081 947 50 35

e-mail: [yvonne.flepp@kns.ch](mailto:yvonne.flepp@kns.ch)

---

### **Biblioteca populara Mustér Kamishibai cun Mats, la miu**

Eis ti denter 3 e 7 onns? Has ti gust da vegnir cun tia mumma ni cun in'otra persuna d'accumpignament en biblioteca e tedlar praulas ni historias?

Mats, la miur e nus dalla biblioteca raquintein a ti ina praula ord in cudisch da nossa valischa da surpras en fuorma da Kamishibai e quei mintga gada *il secund venderdis dil meins dallas 14.30 tochen ca. las 15.30*. Nus selegrein zun fetg sin tei ...

Tgisà, forza anflein nus mintgatun aunc enzatgei auter che mo cudischs en nossa valischa da surpras!

Cun ils pli cars salids e sin seveser tochen gleiti.  
*Mats, la miur ed il team dalla biblioteca populara Mustér*

**Termin:** ils 14 da zercladur 2013